

同治常甯志卷六

戶口

風俗

戶口

謹案歷代地理志必稽戶口以驗繁昌常甯自吳至後周史冊無攷故編籍從宋始然有明一代較宋元大減吾常遞遭兵寇其凋殘戶口至此乎我國家深仁厚澤長養生息戶口所由日增也

宋主戶萬七千八百五十六口五萬九千九百八客二萬二千九百八十一口三萬九千五十一

元戶萬八千四百三十一口六萬九千四百二

明洪武二十四年軍民戶一千三百五十六口七千六百九十九萬歷元年軍民戶千五百九十一口八千九百六

同治常甯志

卷六

戶口

一

國朝雍正九年軍民戶萬七千九百五十七口五萬三千八百七十一嘉慶二十二年民戶二萬七百一十七口十六萬九千八百八十五屯戶萬三千五百四十七口十一萬五千七十二道光二十年民屯戶四萬三百四十二口三十一萬七百五十二咸豐十年民屯戶四萬六百六十口三十一萬二千二十二

風俗

時序附

火耕水耨民食魚稻以漁獵山伐爲業果蓏贏蛤食物常足故嵒窳媮生而亡積聚飲食還給不憂凍饑亦無

千金之家

漢書地理志

湘川之奧土豐民閑

南齊志

有材木茗

莽之饒金鐵羽毛之利其土宜穀稻賦入稍多深耕概

種率致富饒好訟亦多信巫鬼宋史地理志俗尙農桑民知

教化方輿勝覽地僻民醞事簡易治輿圖州濱溪崗民剛勁勇

悍刀耕火種元常甯冊其風揚其俗悍其於冠禮喪祭頗

有相賙之義近主客軍民雜居多訟湖廣志土瘠田中下

士好詩書民喬而樸婚喪賓禮稍近文飾康熙縣志

元旦昧爽啓戶向吉方出行焚香楮拜祖先然後以序

拜其尊長親隣往來相拜賀爆竹聲喧是日禁掃地占

風之方向以驗歲之登耗北主稔南主歉又觀天色明

暗明多晴暗多雨

同治常甯志

卷六

風俗

二

立春日剪綵爲燕競看土牛是日喜晴諺曰若得立春

晴一日農夫少用耕田力

上元節剪紙爲燈鄉村街市鉦鼓喧闐有龍燈花燈諸

戲又以布作獅形宛轉跳舞倣古儺禮是日游觀午夜

不禁

社日祭社神以祈穀農於立春後卽禁戍不以金犯土

逢社尤甚閱五戊乃止是日宜雨諺云春社無雨不種

田秋社無雨不種園

寒食去冬節一百五日卽有疾風甚雨禁火三日亦謂

禁煙

清明日人皆修墳塋具酒肴掛紙幡於墓農人漬種以桐花開爲候諺曰二月清明莫在前三月清明莫在後蓋因時播種早則春寒未除緩則秧遲也又有晴清明暗穀雨之占三月三日士民出踏青折柳鬪草四月布穀鳴農家入田以此爲候浴佛節造烏色飯相饋遺謂之青精飯是日喜晴諺曰四月八日晴擔秧插茅坪四月八日雨踏斷水車嘴立春後算至一百二十日必有大雨謂之雪水轉四五月閒江湘梅欲黃落水潤土溽柱礎皆汗蒸鬱成雨衣服被潤皆驗

同治常甯志

卷六

風俗

三

端午節采艾懸門戶以蒜汁灑地飲菖蒲酒塗硃砂雄黃於小兒額以辟邪毒以檜竹葉裹糯米爲糉卽角黍也造龍舟競渡馳耀鼓柁響振水陸觀者如雲六月六日宜晴人家曬書籍曝衣服是月早稻熟嘗新肴用魚肉不用雞以魚字音近餘雞字音近飢也夏至入伏民間及時造酷醬七夕陳瓜果於庭婦女結綵縷穿七孔針爲乞巧看天河隱見以占來歲豐歉甚驗中元節設醴肴羹飯薦先祖鼓樂衣冠迎神送神翦紙爲冥服並楮焚之

中秋節以月餅及雜物相饋送設酒賞月諺曰雲掩中秋月雨打上元燈又云是夜月明則明年湖中魚少以魚趨月光溯流而上也

重陽節登高佩茱萸簪菊花藉草飲酒以是日晴雨占冬景諺曰重陽無雨一冬晴

冬初上墳祭掃如清明

臘八日民間以雞豚祀竈神雜棗菓煮粥曰臘八粥臘月二十四日爲小年節是日拂除梁塵至夕設酒醴焚香楮祀竈俗傳竈神朝天申奏人間善惡

除夕設酒焚香祀神祭祖畢盛爆竹家人會飲曰團年  
換桃符貼門神以紅紙書春聯貼牖戶燈燭圍爐達旦謂之守歲杜詩云守歲阿戎家椒盤已頌花

同治常甯志

卷六

風俗

四

新會何聯寶常甯竹枝詞三月清明莫在後二月清明莫在前只看桐子花開後漬種先畊近水田  
晃日腰鎌稻熟初嘗新卯日翦珍蔬糟牀壓得新醇子不食家雞只食魚  
碧杉疏竹枕寒淙白板門邊住小艖爭就急流安水碓長琴山下有春江

同治常甯志卷六終